



Inatsisartunut ilaasortamut
Erik Jensen
Siumut

1-10-2021
Suliap nr. 2021 - 17144

Postboks 260
3900 Nuuk
Tlf. (+299) 34 50 00
Fax (+299) 34 66 66
E-mail: iian@nanoq.gl
www.naalakkersuisut.gl

Annikitsumik aatsitassarsiorneq pillugu § 37 naapertorlugu apeqquteqaammut nr. 128-2021-mut akissuteqaat.

Asasara Erik Jensen

Inatsisartut suleriaasianni § 37, imm. 1 naapertorlugu annikitsumik aatsitassarsiorneq pillugu Naalakkersuisunut apeqqutit matuma kingulianiittut saqqummiuppata, taakkualu matumuuna akissuteqarfigineqarput.

Siullermik annikitsumik aatsitassarsiornermut suliassaqarfimmut soqutiginninnermut qutsavigaakkit. Annikitsumik aatsitassarsiornermut suliassaqarfik Naalakkersuisut ukkatarinerulerusutaat, taamaalilluni suliassaqarfik taanna Kalaallit Nunaanni innuttaasut amerlanerit piviusumik inuuniutigisinnaalersinnaassallugu. Taamaattumik Naalakkersuisut annikitsumik aatsitassarsiornermut suliassaqarfimmi inatsimmik immikkoortumik suliaqaleruttorput, ilaatigut annikitsumik aatsitassarsiornermut pisinnaatitsissummik pigisaqartut suliaqarnermik ingerlatsinissaat ajornannginnerulissalluni.

1. Aatsitassanik annikitsumik piaanerit (småskala) aallalavigalugit Nunatta karsianut qanoq annertutigisumik ukioq 2018-imi, 2019-imi aammalu 2020-imi isertitsissutigineqarpat?

Nunap karsiani annikitsumik aatsitassarsiorluni inuussutissarsiornermit isertitai tassaasinnaapput toqqaannartumik isertitat, soorlu pisinnaatitsissummik pigisaqartut suliaqarnerannit akileraarusiinerit, aamma inuussutissarsiuutini attuumassuteqartuni ingerlataqarnerulernerup malitsigisaanik toqqaannangitsumik isertitat, soorlu angallatinik attartornerit aamma takornariartitsinermik suliaqartut. Taamaattumik isertitassat ataatsimut katillugit eqqortumik naatsorsorneqarsinnaangillat.

Pisinnaatitsissummik pigisaqartut ukiumi aatsitassarsiorluni ingerlatanut nalunaarusiamik ukiumoortumik nassiussartussaapput, ilanngullugu aatsitassat tunineqarsimasut naatsorsortussaallugit. Akuersissummi ingerlataqartoqarsimappat aatsaat nalunaarusiamik nassiussisoqassaaq.

Akuersissutini ataasiakkaani tamaginni nalunaarusiornerit akuersissutit journalianni nalunaarsorneqartussaapput. Maannakkut paasisutissanik nalunaarsukkanik nalunaarutigineqarsimasunik



ataatsimoortitsisoqarsimangilaq. Qaammatisiutit malillugit ukiunut pingasunut ataatsimoortumik naatsorsuineq, qaammatisiutit malillugit ukiumi apeqqutigineqartumi annikitsumik aatsitassarsiornissamut akuersissutini tamaginni misissuinissaq pisariaqartussaavoq. Tamanna akissuteqarnissamut piffissamut killiliussap iluani naammassineqarsinnaangilaq. Taamaattumik taamaallaat qaammatisiutit malillugit ukiumut 2020-mut naatsorsuineramik suliaqarnissaq aalajangiuppara.

2020-mut ataatsimut katillugit naatsorsuinerup takutippaa annikitsumik aatsitassarsiornissamut pisinnaatitsissummik pigisaqartut ataatsimut katillugit 89.500 koruuninik nalilinnik aatsitassanik tunisisimasut.

2. Aatsitassanik annikitsumik piaanerit (småskala) aallalavigalugit Nunatta karsianut qanoq annertutigisumik ukioq 2018-imi, 2019-imi aammalu 2020-imi nunap immikkoortuini isertitsissutigineqarpat?

Takuuk apeqqut 1-imut akissut.

3. Isertitaqartoqarsimappat taakkua qanoq agguataarlugit isikkoqarpat? Ukiumiit ukiumut takussutissartaat perusunnarpoq.

Takuuk apeqqut 1-imut akissut.

4. Kuannersuarni annikitsumik aatsitassanik (småskala) piaanissamik kina/kikkut akuersissutilluppat?

Maannarpiaq Narsami Kuannersuarni annikitsumik aatsitassarsiornissamut akuersissummik tunniussisoqarsimangilaq. Aatsitassarsiornissamut akuersissutinut, ilanngullugit annikitsumik aatsitassarsiornissamut akuersissutit, tamaginnut nunap assinga Aatsitassanut Aqutsisoqarfiup nittartagaani tamanit takuneqarsinnaapput – www.govmin.gl.

Pisinnaatitsissummik pigisaqartut nammineerlutik aalajangersimasumik najugaqartut pisinnaatitsissuteqarfimmi katersinissaat akuerisnaavaat. Taamaattoqartillugu tamanna nammineq illuatungeriit akornanni isumaqatigiissutigineqassaaq, Aatsitassanut oqartussaq tamatumingga paasissutissanik tigusaqartariaqarani.

Tamatuma saniatigut aatsitassarsiornissamut paaanissamullu akuersissummut nalinginnaasumut pisinnaatitsissummik pigisaqartoq tamatumunnga allaganngorlugu akuersippat, annikitsumik aatsitassarsiornissamut qinnuteqartoq sumiiffimmut nalinginnaasumik aatsitassarsiornissamut paaanissamullu akuersissummiittumut akuersissummik tunineqarsinnaavoq.

5. Naalakkersuisut, ukiut kingulliit sisamat eqqarsaatigalugit, aatsitassanik anngiortumik eqqunngitsumilluunniit suliaqartoqarsimaneranik, tuniniaasimanernilluunniit ilisimasaqarpat?

a. Taakkunani annikitsumik akuersissutaatilinniit peqarpa?

b. Peqarsimappat suna peqquataava?

Naalakkersuisut aatsitassanut suliaasaqarfimmi ingerlaavartumik nakkutilliipput, ilanngullugu aamma paaaneq, tuniniaaneq imaluunniit annissuineq pillugu suliaasani. Pineqartoq annikitsumik aatsitassarsiornissamut pisinnaatitsissuteqartuunersoq taamaanginnorsorluunniit pillugu tunngavissarititaasut malillugit nakkutilliinermi suliaasat immikkoortiterneqartanngillat, taamaattumillu annikitsumik aatsitassarsiornissamut pisinnaatitsissummik pigisaqartunik akornanniittoqarsimaneera mattunneqarsinnaangilaq. Avammut annissinissamut akuersissummik pisariaqartumik peqaratik Kalaallit



Nunaanniit aatsitassanik annissiniartoqartarsimasoq, Aatsitassanut Aqutsisoqarfik ilanngaaserivikkoortumik ingerlaavartumik paasitinneqartarput.

Inussiarnersumik inuulluaqqusillunga

Naaja H. Nathanielsen
Naaja H. Nathanielsen